

*nouvelle Eglise.*

47—48. en Iesus Christ, ce n'est pas de merueille s'il sont scandalisez de la Croix: Mais que vous, qui pretendez d'estre participans du merite de sa passion, comme nous, l'ayez en horreur, qui est le Chrestien qui le croiroit, s'il ne le voyoit? Saint Paul Apostre crie: Ia à, DIEV ne plaise, que ie me glorifie en autre chose, sinon en la Croix de nostre Seigneur Iesus Christ: et à vous au contraire, la Croix est execrable et abominable. Est ce pas vn signe euident, que Saint Paul auoit vn esprit, et vous en auez vn autre? Si Saint Paul se glorifiant en la Croix vient à dire: Cherchez vous espreeue de IESVS CHRIST, qui parle en moy, l'ayme beaucoup mieulx que vous pensiez que ie le vous die, qui c'est qui parle en vous. Est ce pas vn grand cas, que la Croix laquelle par la mort de Iesus Christ est deuenue glorieuse, magnifique et triumpante, comme estant le trophée et illustre signe de la victoire, qu'il a eu contre le peché, la mort, et le diable, est par vous vilipendée, contemnée, et mise par terre, veu que si vous venez à estre sauuez, vous le tenez d'elle? Que diroit maintenant Constantin l'Empereur treschrestien, et sa mere sainte Helene, qui firent fermer les temples des Idoles, et és Saintes Eglises eleuer la Croix de Iesus Christ, s'ils voyent qu'entre les Chrestiens mesmes la Croix est abhorrée? diroyent ils pas, qu'il est impossible qu'ils soyent Chrestiens, veu qu'ils ont en horreur le signe de leur saluation? Que diroyent Saint Athanaze, Saint Gregoire Nazianzene, Saint Chrisostome, Saint Augustin, Saint Ambroise, Saint Hierosme, et tant d'autres Docteurs de l'Eglise de Iesus Christ, lesquels les plus scauans d'aujourd' huy ne sont pas dignes de dechausser, qui ayent escript en plusieurs passages, voyre et des liures tous entiers de l'adoration de la Croix, sont venuz à dire, que n'au Baptesme, n'au Saint Sacrefice du corps de Iesus Christ, n'aux Saintes Ordres, n'en aucun Sacrement, rien ne fait ainsi qu'il appartient, sans le signe de la Croix. Que diroient ils, dis-ie, s'ils oyoient auiourdhuy les execrables blasphemes, et les scuriles et impudentes moqueries, que proferent aucuns qui se disent fideles, contre le Saint Sacrement de l'autel, à raison de ce signe qui s'y fait? Diroyent ils point, que Satan les a esleuz,

43—44. 6 Marnix' Byencorf.

C i<sup>r</sup>*Gal. 9.*

*Les nou-  
ueaux fide-  
les ne sont  
pas menez  
par le  
S. Esprit.*

C i<sup>vo</sup>

*August.  
in Ioan.  
trac. 118.  
Chrisost.  
in orat. de  
ador. cru-  
cis.*